

圓覺經略疏之鈔

圓覺經略疏之鈔卷第二十

圭峯蘭若沙門宗密於大鈔略出

疏經云下三會通兩文。身心一者義如前科也。皆據能現者遮疑情也。緣海東曉法師釋彼論此科法合鏡喻之意云。法身似質化身似影。恐有曾見彼疏者疑云。既云現於眾生心中。卽合是應化之身。云何言法身及真心耶。故此通云據能現之本等也。疏此約下四別釋現義。謂正當知佛心亦如此之時。佛心是所知。所知之境的從自淨心顯現。如變影緣真如也。卽真如非影。不妨變影緣如。卽知佛心亦爾。經結名

中疏翻云止者止於萬緣方得寂靜寂靜是顯相止是釋名。於染等者雙成止義及寂靜義間。既此三法皆名觀。云何此門脩止答前標意此宗必具理事定慧皆無障礙故觀觀皆止止於餘觀非論妄緣故下文云若他觀者名爲邪觀止止皆觀念念心心若一間斷卽無明故故前云恆作是念然每觀爲門不同立意各別此約止門而脩止觀也由此義故於涅槃起信及天台等所說三門皆大同也如下三觀終處具說若準涅槃下引經釋也然彼經中此一段文義廣辯三相同此三觀具有標意別釋總釋至下具引

以會此中三觀。今且直配此觀一門。然亦不具錄其文。但列名而已。今爲具引對詳可解。文云奢摩他者。名爲能滅能滅一切煩惱結故。此前亦云身心客塵從此永滅。又奢摩他者。名爲能調能調諸根惡不善故。此前云內發善法攝故。輕安輕安是。又奢摩他者。名曰寂靜能令三業成寂靜故。此前云內發同全法攝故。又奢摩他者。名爲遠離能令眾生離五欲故。又奢摩他者。名曰能清能清貪欲嗔恚癡三濁法故。以是義故。故名定相。經起行中疏心性是識者。是心識自性也。非所依真性。真性依士釋此則持業釋。疏能幻之者。如普賢章備釋。法喻各有五門。檢而示之。依如幻始覺等。

者具如普眼章中二空觀也。然彼與此有三意異。彼明稱理圓觀以成圓頓悟解。此明尅體進脩堅持不捨以彰觀行。又彼是總相觀行。普被諸根。此是別相方便。別對一類彼上根入。此中根入。疏隨機應化等者。此約在觀行中學習化行釋也。謂變起種種方便說法。開示眾生。或想種種現神通事攝化之方等。或坐時習此方便。或餘時正觀機說法。皆是學習化行之義。但以決定志願大悲之力。念念如此。卽是脩習行化。故經次云。內發大悲輕安。若觀心釋下。約脩治心行釋也。謂染淨皆空。心變卽有。妄識旣已變起塵

境難可頓除故今以悟解方便變化引起一切情塵
以爲所緣之境然後以種種對治幻智一一翻之卽
同淨名云八萬四千塵勞皆吾侍者降伏煩惱滅勇
健無能勝如有經說火與薪戰薪多火盛今變起幻
者意在翻破也故云變化不單云變單云變者一向
是妄識所變今云化者表是幻智自在之力知是虛
僞故故名變化非障非蔽者且如慳蔽施惡蔽於戒
瞋蔽於忍等六度旣云六蔽八萬四千例之今觀之
卽淨故知非也且約翻爲六度者如法句經說又若
對上二句卽起諸幻以除幻者有四對別謂自行化行除障起

行止持作持除偏計執翻染成淨一一配之可知經功成中疏根塵既銷者躡上除幻之句亦可取前奢摩他之文彼身心客塵從此永滅故自他無二者正觀成就內發者心行自然如此也卽情發於中而形於願矣同體大悲者由將幻智觀察自他自他皆同圓覺淨性自己旣悟身心喜樂傷他未覺枉受苦惱故悲愍之如富貴勢要之人眼下見他貧苦傭作或爲奴僕若謂他實是下舍貧賤或是奴僕卽心裏平平若聞道是三公貴族子孫家破貧苦或因餘事沒落爲奴卽愴然哀傷便擬救拔濟惠今菩薩了悟淨

覺觀行又成觀諸眾生貧窮無福慧。入生死險道。又觀他皆同覺性。迷故枉受輪轉。是以內發大悲心也。法喻對之可知。疏輕安者。上釋大悲已含此意。釋訖。又於前觀門中釋體用訖。今但略示此門行相也。經結通中疏。從此觀門等者。含二利行也。謂明菩薩從此二利觀門。方能對機起於二行。或宴坐靜室。或於餘威儀中。尅志加行。專注觀門。今得觀行成就。方堪於一切時中脩六度萬行也。乃至佛果者。略於中間。謂成時當十住初心。從此漸次增進。念念不退。自然歷於二住三住乃至十住。十向。十地等煩惱習。

盡行位圓滿卽佛果也。經科揀濫者。恐聞能治所治。皆是幻化。謂言幻智亦同凡識。故初二句揀之意云。觀幻之智。故名幻智。智體非是幻故。前云知幻卽離。又恐聞能觀非幻。便計有能觀之相。故後二句又揀此濫。謂若能正觀幻時。便了所觀無體。可離卽爲眞理。能觀無別能離。卽是本智。則自然觀時。便不同凡迷幻境。若見所觀是幻。是可離法。我能觀智。不同彼幻。不得離之。我能如此。諸迷者不能。若有如上等心。則兼此智亦爲幻也。以取能觀之相故。經科總結者。總結功成已來文也。於中文有法喻。法中但依上解。

了夢喻。卽永離幻相也。經云。是諸等者。如是觀行。功成拂迹。遠離諸病。便是菩薩究竟圓妙之行。從今乃至佛果。念念如此。用心更無別意。設使脩六度萬行三十七品。一切助道之法。乃至捨頭目等時。一只依上來用心。卽此差別諸行。皆成菩薩妙行。若失此意。設能捨身。亦不成無漏之因也。如有比丘自害。佛種種訶責之列。

疏如種穀等者。等一切麥豆之類。覺心者。了悟圓覺之心也。卽上所標悟淨圓覺。以淨覺心等是。謂以淨覺心等者。種依土以生苗。悟約幻而成智。智則親從悟覺而起。不從幻法。苗亦親從種子而生。不從水土。

餘意可見。經結名中疏亦名等者。梵語雖異。所目無殊。餘義如文上來釋起幻觀竟。經起行中疏二。一躡其下。釋明所離。經云以淨覺心。不取幻化等者。文有兩節。初明所離於中。初一句躡所依次。不取下二句明所離。配離前二觀可知。後了知等二句釋離所以。謂見身心卽著我相著。卽起過故。前靜之次。又觀之。今了是礙。故皆不取疏此下下。二釋明所用二。一標指疏。卽上下。二正釋三。一釋法二。一釋正顯體二。一釋所遮。經云無知覺明者。無知覺之明。依士釋也。無知覺是遮詮明是表詮。遮非知覺情識。表是靈明真

性疏所了身心者。此觀所造異於前觀。前觀以了知
身心爲境。故無知者異於心。無覺者異於身。故次云
身觸心緣等。然身觸者。舍於鼻舌身等三根。以皆與
根合而了別故。根則屬身故。心緣者。意在眼耳意等
三識。以離中而了別故。由此分別者。總指諸識。障正
知見者。卽靈妙心體。名正知見。由前云理障礙正知
見。又云圓悟無上知見。後云當求正知見人。故此正
標知見爲所障。兼指其體是無知覺之明也。又緣此
云無知覺明。恐疑真知亦是麤淺。總須泯之。故徧標
矣。若云無知。便是眞知亦無。旣云無覺。覺應亦爾。云

何當部唯宗於覺講者至此必請明示學徒疏正顯
下二釋所表四一直指正顯等者正是此觀所宗道
理體故廣顯其相也其文雖易其法甚深但在說時
分明顯示不可具以文字轉轉釋之可盡但隨文隱
略指而已疏然此下二明無比二一就當體明無比
上下可知傍者四方中者當處無在處者顯無中也
夫言中者皆約當身正住處爲中以分東西上下今
既不取身心之相故無中邊上下也疏欲言下二對
諸法明無比不從緣起者彼法緣會卽起緣離卽滅
靈心不然故不從也餘皆易會其語但恐不見其法

善思念之疏故諸下三辨說儀訶爲邪小者若一向但言空寂者以外道不識執冥性實約小乘妄計三四皆實無爲清辨猶迷一向著於空義故故諸經論訶爲邪小也諸經皆說耽空滯寂是二乘行華嚴說二乘人墮無爲坑又有經云乍可墮有如須彌不可墮空如芥子。瓔珞云樂行寂靜緣覺行肇公不真空論中破本無宗云本無者情尙於無多觸言而賓無故非有有卽無非無無卽無尋夫立文之旨尋經文本意也直以非有非真有非無非真無何必非有無此有非無無彼無此直好無之談豈曰順通事實卽物之情

哉於知見等者是以法華華嚴約卽體之照用呼爲如來知見。楞嚴經內名爲妙明。本明。圓明。今此經文及諸論皆名爲覺。或約體。或從用。各是一義。妄立名字。不同於此言具遮表揀法彰名。不名之名。強安明字。疏今此下四結示經意文顯可知。疏諸礙下二釋離所依迥殊對待者。卽身心真妄。因果染淨。凡聖等。如二乘人超三界。便有三界內外爲對。菩薩超二乘。便有大小爲對。諸佛超菩薩。便有因果爲對。乃至有漏無漏。有爲無爲。悉皆如此。今冥合靈心。並不如此。謂不劣於佛。不勝於凡。不出世間。不屬三界。云云眾多之例

且如無漏聖人爲無礙有漏凡夫爲有礙今旣永超
礙無礙境豈同如上對待法耶。經礙無礙境者疏中
含三意釋礙無礙一超初取靜及次起幻兩門起幻
緣境爲礙。靜無所緣爲無礙故上文云不取幻化及
諸靜相二超煩惱涅槃煩惱繫縛爲礙。涅槃解脫爲
無礙故下文云煩惱涅槃不相留礙三者身心塵域
等總名爲礙若以心離之名爲無礙今皆不爾故皆
離之故云超過也。合起幻及煩惱爲一義合取靜及
涅槃爲一義以爲一對卽上句中涉字下句中同字
是其意也合上句者謂起幻智除幻者又欲變諸幻

開幻眾眾多心數。一作意運動勞擾心慮。雖是觀智涉於煩惱。同是擾亂之行故。此意卽以起幻爲煩惱之礙。不別說貪瞋等煩惱也。合下句者。謂一向取靜。同於二乘厭生死愛涅槃。耽空滯寂。涅槃卽是無礙之法。今取靜行相屬於此科。故云同也。此意卽以取靜爲涅槃之相。不別說擇滅無爲灰身滅智等涅槃也。故此一對異前各說。以爲第三意也。疏屬已者。謂自己所有受用因緣資具。乃至屋宅田地園林臺觀。或爲王官所統部邑。皆名屬己受用之具。此門觀行成就。心合靈源之時。此等宛然仍舊。然都無取捨。

計度有無等分別之念疏共居國邑者瑜伽等論說此三千世界是眾生共業所感貴賤人畜種種有情同共依之而住名爲依報自身則各隨己業貴賤苦樂不同飛走類別名爲別業正報今意在凡常人易見故直云共居國邑謂或一閻浮提或瞿耶尼或一大唐或一土藩等或寬或狹或通或局同一水土所宜風俗所爲山川所出王法所化皆得名世界不必事須三千大千以脩觀行人心之境量不必徧於大千界故疏還有見聞者略舉二識以例餘識且舉心王以例心所此等情慮皆不異尋常未脩觀時但必

無心計度耳。經塵域者。比來情塵之疆域也。疏靈照者。心靈自體有大智慧光明徧照法界義故。毗盧遮那是法界身此國翻云光明徧照餘不釋者皆可意求。疏錠字下二釋喻三一釋喻依言喻所依物也。物非能喻法非所喻此二全殊故也。但物上有義與法上義相似此二義方是能喻所喻也。如將金剛喻般若者。若取二法卽無交涉。謂金剛有形相。般若無形相。般若是決擇之慧。金剛何能擇法。般若萬德乃至恆沙妙用。金剛悉無。今取爲喻者。但說堅利義。金剛者萬物不能壞之堅也。而能碎壞萬物利也。行深般

若波羅蜜者天魔外道煩惱無明一切障等不能動轉堅也能斷煩惱照五蘊空利也但取二法之上各有堅利之義卽便成喻喻者曉喻以相似義曉喻令解令有欲徧看聖教或講義聽義叅學禪慧徵論道理者必須明解法喻比對之意故經云智者以譬喻得解不言愚者疏鍾字不定者推求訓釋此字非聲義故又不全非取意用之亦可通故但以義疑故三釋存焉金石等者等於銅鐵之屬或玉石中有清遠聲也聲相者聲之相貌清濁高低像似之謂也鍾鍾然者但想取擊鐘磬聲勢即可會也巴南風俗亦呼

驢鳴爲鐘錙之聲。但彼重濁不同。鐘磬清遠。迴潤拙者。譯經時。天竺僧宣梵文。解兩方語者。翻出爲唐言。書出名爲筆受。以天竺語與此倒次。須迴文。又彼語朴。次須潤文也。今云拙者。以聲是體。錙是相。先合云聲也。卽大鐘者。切韻中釋也。亦與鑄同訓。問若爾。卽鑄是物質。何不云鑄中聲。乃云器中鑄耶。故次答此意云。是諸器等也。謂諸器中有一金器。或銅等名之爲鑄。擊此鑄時。聲出於外。文甚順故。故云準此。則順本文等也。但筆受等者。良以黃皇二音全同。二字又皆從金鑄錙二字。又亦音同。故易錯也。笙簧者。其狀如此。

笙有十七管。管管置一簧，長短有異。吹之乃中間扇動而有其聲。聲若不品，扇上有微錫如麤糠許大。移之上下，取其聲韻，名曰調譯。譯字疑是清字。管籥之屬者，慈恩唯識疏云：以內有風起聲等故。又老子道經云：天地之間，其猶橐籥乎？虛而不屈，動而愈出。河上公注空虛故能出聲氣無有屈竭時搖動益出王弼注云橐籥守中則無窮盡棄已任物物莫不理若橐籥有意於聲則不足以供吹者之求彼說二事今唯取籥以是出聲物故橐籥是橐籥鞴袋之類非出聲物此等管籥簫笛之類與經所謂之前之義相順也云俱錯者，以簧字爲鍾字，以黃音爲橫音，疏後正下二正釋喻三雖異者，鍾鑄簧也，皆通者三物及身心皆不能拘於所出。聲明與

已中已又不能及之故法喻皆相當矣。

圓覺經略疏之鈔卷第二十

圓覺經略疏之鈔卷第二十一

圭峰蘭若沙門宗密於大鈔略出

疏慈云下三引他釋。鈞者三十斤也。鏞者大鍾也。星樓者鄰星月之高樓。寰區者寰宇區分之國邑。都取聲聞四遠八方不必徧於寰宇。自體者鏞也。他者樓也。未免懷疑者標釋唯言擊鏞至却牒反釋之處又加於管卽知又疑鏞不是錞故又羅之以管。又縱不知譯經差互據現經文所釋亦虧謂經旣云如器中錞聲出於外此卽器不是錞是器中之錞錞不是聲是錞能出聲豈不居然三重各別今釋云萬鈞之鏞

此是器也。便云聲振寰區。豈不漏他锽字。又一重耶。
不能決通等者。又不的斷譯。經訓釋參差。又不的云
锽訓何物爲當是鏞爲當是管。又不言俱是二物。又
不言俱是二物之聲爲當偏是鏞聲。豈非媿音戛音阿

邈略言之乎。媿戛者。莽鹵合其大意之謂也。切韻釋
云。不決也。旣無決斷之文。若有人據上來節目。一一

徵之。何辭以對。若遇講彼疏者。慈心爲具分析。然憇
疏主稟性俊快。亦薄有僧家辭理。直筆科判經文。實
亦可賞。至於經論深義。殊不屆懷。故所隨文銷釋處。
處脫略門門疎闕。亦不尋究經文。前之與後。始終連

帶之意就申釋此一科猶校分明開示餘更闕略但各三句兩句都貌而已余前後所引彼文但據理纔通者卽引之務在證同其爲理性宗之黨援兼不欲遺人之片善然未曾添得一義此意神理可知焉意亦同前者由前具指譯經錯誤自取意用之然後觀慤和尚此文却成相順也仍法合等者因疏中爲他配合法喻故得如此若據彼鈔釋及講傳者亦無此言疏如器下三釋合經功成中疏不取幻化等者幻化雖空不壞虛相但不取著本自無生起之自體故云卽寂然但不作意執取亦不妨任運目覩厯然故

但云寂不云滅。靜者本不是相。由心取之爲所緣境。便有靜相當情。但虛心忘照。不取爲所緣。此相寂滅。不同幻相。住運歷然。滅者但滅此所緣之相。非有靜可滅。靜是心息之義。非所緣境故。又但是下。剋體釋之。然真心之上。有塵沙道理。然皆是隨緣相用。唯寂滅是剋體真實道理。故云實理。上說幻靜二法寂滅。是遮詮中道。今說一心寂滅。是表詮中道。謂此真心當體。元來寂滅。非約動轉無體名寂。生已却無名滅。故前云。圓覺普照寂滅無二。亦同楞伽一心也。故云內發者。結歸經意。皆無心於彼。彼自寂滅。不同上故。

寂之滅之。故云因發因發之言。功成自然之義。經自他等者疏有兩重配自他。一以餘人爲他。以已之情識爲自。二以情識爲他。假籍外緣方起故覺悟爲自。但是本覺發顯唯獨自等者是法華文。彼說意根清淨。此說觀智成就。亦分位相當。疏但想所持者。如夢中身心根識。但是夢想所持。都無自體連續。法合可解。疏中意在目覩易見之像。故舉空雲之喻。若論事理親切。本末相當。不及夢喻。經結名中疏二。一此云下釋此所結二。一正翻譯。靜慮者。如前四禪中釋也。非無記者。意顯不是一向趣寂。沈空無所鑒辨。故非無記。不同三。

性之中無記也。定慧平等者。大小乘經論皆說欲界慧多。四空定多。唯有一禪定慧平等。禪必兼定。定不兼禪。故定有八。禪則唯四。疏問卽下。二問答會通直造心源者。非定非慧也。由雙非故相卽也。義甚明者。不取幻靜是絕待。超礙無礙是絕待。煩惱涅槃不相留礙是絕待。指脩行者。直令如此用心也。忘情者。都不作意言。定言慧。卽是雙非。亦不言真假起止。卽是絕待。約義結者。是佛印此悟淨圓覺忘情之人云。如是方名定慧平等。故云禪那。非此人自云我定慧等。亦如金剛云。卽非三十二相。是名三十二相。非具足。

色身是名具足色身皆卽非是心智契合是名卽是義結也。乍看似卽非與是名相違達之乃全相合。此中亦如此也。疏三觀下。一總判三門二。一配前經。言標悟者若諸菩薩悟淨圓覺心也。文殊中者彼說四大緣慮如空華三月無明如夢中人非實有體生死輪廻身心等相非作故無本性無故能知覺此者亦空華相乃至常不動故如來藏中無起滅知見故卽知今還見有種種者但是動念之過故脩靜觀止緣澄念今證彼也脩普賢等者彼說以幻脩幻幻盡覺滿眾生幻心還依幻滅普眼前半分析四大根識塵

境乃至幻身滅故。幻心幻塵幻滅亦滅。垢盡明現故。
脩幻觀以除幻者。普眼後半等者。彼說摩尼珠喻。現
色無色垢盡對除。卽無對垢。及說名者。滅影像故。無
方清淨無邊虛空覺所顯發。身心根塵四大三界。本
淨不動。乃至一切覺故。本成佛故。剛藏中種種差別。
皆不預圓覺乃至生死涅槃起滅。覺照離於華翳。皆
明諸法斷滅。靈覺廻超對待。故當絕待靈心。各依此
配一一相當。故知此行脩彼解也。但以頓悟漸脩故。
前通此別。上根者直稱所悟。故不分別。中下力難赴
心。故佛各隨機便開成三也。至下除我等四相。及憎

愛等方得入覺。卽脩前中彌勒斷輪廻根本也。依師除病不作如是脩習等念方得從凡至聖。一一隨順覺性也。由離四病方得不起妄念不滅妄心不了妄境不辯真實等故知普覺中則是脩清淨慧中解矣。疏然此下二會異說二。一會涅槃三相言三相者彼經云卽彼第三十及三十一下中文也無十相故。色聲香味觸生住壞男女名大涅槃。若有比丘數數脩習定會捨相卽三相也則斷十相定名三昧。若取色相不能觀色常無常相是名三昧。若能觀色常無常相是名慧相。三昧慧等。駕馴遲疾觀一切法是名捨相。二乘定多菩薩慧多世尊等故。明見佛性。見佛性者名爲捨相。奢摩他

者。名爲能滅。云云如上所引。故名定相毘鉢舍那。名爲正見。偏見次第見別相見。是名爲慧憂畢父者。名曰平等。不淨不行觀。是

名爲捨菩薩善知定時。

生大憍慢慧時。

精勤未益故悔心非脩定

時捨時。

定慧不等不宜脩捨等則脩之。

及知非時。

各如上注。

是名行菩提道。

大同者。此初名止。取靜澄神定相增勝。

彼云但不取色相。

此

云取靜爲行皆定境也。又彼次後文云脩習定者。

能見五陰生滅之相。此云由澄諸念覺識煩動。

次

了根塵起幻除幻慧相增勝。後絕待雙融。卽全同彼

云平等名捨相也。

等卽雙融捨卽絕待。

小異者。彼則初定次慧

後等。此則三門皆含定慧。然彼雖殊。初定次慧亦從

增勝說。豈實教中。有偏定偏慧耶。疏與天下二會天

台三觀此依瓔珞經所立文云從假入空名二諦觀
從空出假名平等觀是二觀爲方便道因是二空觀
得入中道第一義觀三觀現前卽入初地天台撮略
云一者從假入空觀二者從空出假觀三中道正觀
此三行相懸談已釋約心成行者緣前六章經文已
備顯覺性推破妄執究諸法性相辯心境染淨乃至
從凡入聖障治通塞斷惑深淺證智勝劣等訖此但
一向令忘情絕慮泯相冥真所以不立所觀境也約
義生解者彼但以止觀爲宗初勸欣求佛果厭離生
死便讚止觀是出離門是大道門顯觀行相卽是此

三觀也。惟尋諸法真妄性相。以顯空假等義。以開斷證門戶。故須立所觀三諦。境智相對。義相方明。經校量中疏五戒十戒者。在家五戒。一不得殺。二不得盜。三不邪淫。四不妄語。五不飲酒食肉。八戒加不得香油塗身。故往觀看上高廣大牀。十戒沙彌戒。加不得捉生金銀財物。不得過中食也。六通者。如序分中說八解者。八解脫也。取文相對便宜。故略一字。謂一內有色觀外諸色。不淨解脫。二內無色觀外諸色。不淨解脫。三內無色觀外諸色。以爲淨解脫。身作證具足住。四空無邊處解脫。五識無邊處。六無所有處。七非

想非非想處解脫。八淨解脫身作證具足住也。十纏
者俱舍云。纏八無慚愧嫉慳并悔眠掉舉與惛沈或
十加忿覆聞慧等者緣三界從凡入聖必須具之故
此配也。經問所脩中疏爲復一人等者據下經文此
等皆有謂初三輪則三人各一。最後一輪卽一一具
三中間交絡者或前後文云先脩中脩後脩等或同時經云齊脩等
亦有依次先脩奢摩他中脩三摩提後脩禪那卽是也或超次先脩奢摩那經長行中疏二一正說下科分二隨釋經標數中

終義等廣在大疏。經觀網交羅疏。二二觀下分科。
敘古憇疏等者。然此觀名亦未能顯發經意。亦未能
引人心入於觀行。但緣文辭美暢。多有愛者。故存之
矣。今全用者。依之管經。兼能釋觀名。以將配合經意。
二正釋經文。經科澄渾者。約喻說也。謂水有塵泥。須
澄令清。心有煩惱攀緣。垢濁亦爾。息用者。非唯不緣
諸境。亦不起用觀察。幻與不幻等也。故憇疏云。且水
性清潤。溉灌呈功。投於外塵。涓_{音骨}然將濁。棄之則亡
其所用。留之則濟。飲不堪。在器安澄。隨流分異。去泥
純水。則永斷無明。明相精純。斯何不證。疏法空座者。

經云諸法空爲座。座是安居之處。菩薩常居諸法空境。入寂滅者無住究竟涅槃也。據寂滅理合是中觀。由此菩薩利根心靜功成於法空處便證中道不待空病亦空方至中道。以此菩薩入空本無住空之病。故據後文例斷煩惱入寂皆是絕待觀中行相故須作此釋也。經庖丁恣刃觀云以佛力等者前開幻眾及內發大悲此以佛力卽當大智變世界者如前變化諸幻也種種作用舍於逆順自他之利備行等句則唯順行於陀羅尼下總明動而常寂寂念靜慧卽定慧也。經呈音出礙觀疏二。一三星下解科名取前

錚聲出外。作此觀名。謂音是錚等之聲。皇是遠聞。礙是鍾體及樓出。是不能拘局疏器質等者。器是鍾等質是質礙。融是流通。扣是杵擊。若據彼疏卽云隨撻應響。今云扣者意在順本喻意疏以諸下。二釋經義無邊等者。有二意。一此幻境是世俗人間古今差別利害之事。及三世因緣染淨差別等事。廣多無邊不可推窮。今悉會盡營之。無有了期。受之無有足日。故不如絕念滅迹。一切都休。二幻體是空。都無邊底。而可窮究。故達者絕心不預。名爲滅也。作用等者。如前章起幻變化而開幻眾。及此前科種種作用等。今皆

不取也。不可得者是前空義。無所觀者證絕觀義。絕觀義者。不取前靜境幻境也。經交絡三觀疏五。一後交下。配結輪數。疏然每下。二顯示交絡兩段。二。二共合者。如以靜觀爲首。卽第一初靜後幻。第二初靜後寂。名兼其一。三行次第者。一初靜次幻。後寂。二初靜次寂後幻。次兼餘二。先一後齊者。初靜後齊幻寂。齊兼餘二。先齊後一者。一初齊靜幻。後單寂。二初齊靜寂後單幻。今以靜觀爲首。既如此。餘二爲首。一一例之。疏今每下。三用科儀式二。二正明。長科七者。若據上所科判卽合。且每觀分爲四段。然後於一二三四中。每段復各分二。

今恐節級碎分。展轉惑於觀照之意。故但長科七也。
一一須牒者。緣觀名各有四字。若二觀爲一輪。卽有
八字。三觀爲一輪。卽有十二字。二十一輪相計。虛書
二百餘字。又文句重疊紛起。難尋次緒。故須略之。後
寂者。經中一一云寂滅也。疏寂與下一二辯異寂是中
道。故影法師中論序云。寂此諸邊名之爲中。故與靜
異。前威德章。此觀已廣分析。疏文中下四總別科分。
五隨文銷釋。經初七輪一中疏。一一運下解科名。
脩定者。卽取至靜也。緣對經云。以靜慧心。故直言定。
律宗以戒爲船筏。禪門以定爲舟航矣。言運舟者。運

通三意。一自運故云出塵。二運他卽是兼濟。若無二意。何名爲兼。如船師渡人。豈自住此岸耶。若住者。但名借船。不名度人也。細詳舟體。正是靜觀。餘文易見。疏標靜下。二節經義。經二中疏二。二湛下解科名。湛海澄空者。如海波浪不生。湛然不動。靜觀成也空無雲霧。廓爾清虛。海無邊涯。連天一色。空徹海底。海含空相。故云澄也。脩寂觀也故云波瀾不動等。大波曰瀾。反生死流。如波不起。故水卽清明。如靜觀功成。靈心寂照。卽是性也。故云顯性。疏寂也。下二節經義。躡靜脩寂者。如水。因不動。卽清明。清明。卽可澄空也。餘文可了。

經三中疏二。二三首下解科名。首羅者。大自在天三
目。如涅槃經說。以喻涅槃三德。今三觀理亦昭然疏
靜也。下二節經義經四中疏二。一四三下解科名。三
點者。亦是涅槃三德之喻。慈意等者。觀名齊脩經云
先後。故爲彼出其意耳。若約伊字三點。如此經云
不縱不橫。今此三觀有先中後。卽是其縱。且約大綱
細詳。不切若無損益。不能改也。疏靜下。二節經義經
五中疏二。一五品下解科名。疏靜下。二節經義經六
中疏二。一六獨下解科名。此一兼前品字皆全似也。
疏齊標下。二節經義經二中疏二。一七果下解科名。

靜定之樹等者。離念靜心爲道之本。如樹寂滅是極證之法。故如果雖頓契證寂滅隨俗漸脩自利利他。然亦不失寂念。故如果落還依樹開華也。此亦且取大意。不得始終的切。疏齊滅下。二節經義。經次七輪一中。疏二。一。今初下解科名。武王等者。尙書說武王以順天應人。故救天下生靈塗炭。不得已而伐紂。既克遂歸。放馬於華山之陽。放牛於桃林之野。鑄干戈爲農器。表示天下。不復再用。偃武脩文。以理天下。以養兆人。故喻此先動用後息靜。疏標幻下。二節經義。經二中疏二。一二功下解科名。功成者此門與前雖

法體無別。先動後靜之喻亦無別意。盡此幻觀爲首已來。喻皆同一類例。亦是不得委細也。疏幻下。二節經義。經三中疏二。一三幻下。解科名。疏幻下。二節經義。經四中疏二。一四神下。解科名。疏幻下。二節經義。經五中疏二。一五龍下。解科名。龍樹者。初在外道中。善於幻術。後入佛法。乃至證於初地。真彰諸論記傳。疏幻下。二節經義。經六中疏二。一六商下。解科名。商那者。具如懸談鈔引。付法藏經備說。疏齊靜下。二節經義。經七中疏二。一七大下。解科名。大通如來者。法華經說。此佛受諸梵天王及十六王子請。卽轉十二

因緣法輪。千萬恆河沙那由他眾生皆得解脫。王子等出家諸根通利。大眾請佛說法華經。眾皆信解。佛說是經於八千劫。未曾休廢。說此經已。卽入靜室。住於禪定。八萬四千劫。故云爾也。疏齊寂下。二節經義。經後七輪一中。

圓覺經略疏之鈔卷第二十一

圓覺經略疏之鈔卷第二十二

圭峰蘭若沙門宗密於大鈔略出

疏二一此初下解科名寶明者寶有光明數數舒光而却入海餘文自顯疏寂下二節經義經二中疏一二虛下解科名疏寂下二節經義經三中疏二三舜下解科名舜若空神者舜若此云空也以虛空皆有主空之神如華嚴說每因日光卽略現於身卽依空況有之義可詳同於疏疏寂下二節經義經四中疏二一四飲下解科名飲光者迦葉身光吞飲日月之光歸定住鷄足山也疏寂下二節經義經五中

疏二。一五多下解科名多寶塔者說處甚多疏寂下
二節經義經六中疏二。一六下下解科名法華菩薩
六萬等者經說他方諸來菩薩八萬恆河沙數白佛
願於佛滅後於此世界弘是經典佛止云不須汝等
護持是經我娑婆界自有六萬恆河沙菩薩一一有
六萬恆河沙眷屬於我滅後廣說此經說是語時三
千世界地皆震裂此菩薩等於中同時涌出身皆金色
先在此世界下虛空中住故喻先空後假餘文可
見疏齊靜下二節經義經七中疏二。一七帝下解科
名疏齊幻下二節經義經圓修三觀疏二。一後有下

釋科名疏稱圓下二解經義經偈諷疏無能所修等
者緣此偈與長行文異意同恐不解配合故此釋之
長行云圓覺清淨本無修習及修習者卽是無能所
也三觀之初又云於諸修行實無有二悉不言禪定
今偈中孤然云依禪定生卽知心冥無修之理卽是
禪定此乃長行標文偈中顯意亦可長行舉法偈中
釋義妙在此也疏加之繩索等者卽淨名經中優波
離與二比丘依法懺罪維摩詰訶云無重增此二比
丘罪當直除滅勿擾其心所以者何彼罪性不在內
不在外不在中間如佛所說心垢故眾生垢心淨故

眾生淨心亦不在內不在外。不在中間。如其心然罪垢亦然。諸法亦然。不出於如等。今云加繩索者。卽重增之意。傷乎無瘡者。卽是前富樓那在一樹下爲諸新學比丘說法。維摩詰又訶云。唯富樓那先當入定觀此人心。然後說法。無以穢食置於寶器。當知是比丘心之所念。無以琉璃同彼水精。汝不能知眾生根源。無得發起以小乘法。彼自無瘡。勿傷之也。欲行大道。莫示小徑。乃至我觀小乘智慧微淺。猶如盲人不能分別一切眾生根之利鈍等。釋曰。維摩意以爲新學說。小乘法是傷乎無瘡意顯。以大乘法說。今此疏

意明圓頓悟解之人稱真覺性不假道場探結等若令探結卽是傷乎無瘡耳經兩重除障疏二一次後下標意故同大科者大科云次四問答別明觀行今乃於中有二問答是除我離病似非觀行恐有不細詳者生疑故此云是觀行中障也約修證帶我不同全執我相者故障別門觀行如前通明觀行中亦有彌勒一章斷除貪愛貪愛是六道根本亦障通門觀故二釋文經除我入覺疏二一初中下總明科意二別釋經文經慶前中疏如琉璃等者內外明淨透徹故瓶喻一念多芥子喻多劫萬行經正問中疏何法

染汙者初悟同佛。妄起還凡。故志公偈云。佛從魔境出。煩惱中悟解菩提如淤泥中蓮華。

妄二頭不相辨。渾雜國王城。

前

覺經長行中疏二。二正

說下科分。二隨釋經過患本起中疏兩論所說者。天

親論云。見五陰。一一陰是我相見我命斷滅復生六

道爲人相見我身相續不斷爲眾生相。即盛衰苦樂眾多變異也

計我一報命根不斷而住爲壽者相。無著論云。取自

體相續爲我相。我所度爲眾生想餘二意同。但無著

云想天親云相。今叅而用之。我全用無著壽全用天

親。餘二展演其文令人易解。肇注淨名云。縱任自由

謂之我。常存不變。謂之壽。貴於萬物。而始終不改。謂之人。眾生。大同。此皆情識所計。故云迷識境也。經說者。約證悟覺性。而帶能所。從麤至細。展轉遣之。四相遣盡。方始無遣。故云迷智境也。疏妄我本空等者。淨名云。法無有我。離我垢故。法無有人。前後際斷故。法無眾生。離眾生垢故。法無壽命。離生死故。慈云。心自取心。自成心病。演若愛影。背本瞋頭。從此妄滋。莫能蠲拂。經過患滋多疏。二二明下科判二一總科疏。今初下二別判。二隨釋經。展轉中疏。二一謂由下銷經可知。疏然上下。二配四諦。云二乘者。離通大乘。大

乘以爲虛妄本空之義。但宗無生等也。故般若心經云。無苦集滅道。生滅者準天台教權實通論。總有四重四諦。離名道謂止觀等也。一、生滅。逼迫名苦。卽有漏色心增長名集業煩惱。寂靜爲滅。謂卽涅槃出二、無生三、無量四、無作。如次是彼四教所詮法矣。今此文中約其過患。故當生滅後三重四諦。廣如大疏大鈔所明。此但略引之意。用前生滅以銷疏文。不能繁敘。初六句等者。依數句次第配經文。相甚明。各須一一配釋。以示聽徒。經直釋中疏最初根本者。論中根本不覺也。本源者。性淨真心也。依本覺而有不覺等。疏由將無始等者。勝鬘說五住地也。經

轉釋中疏二。二轉下明科意疏未曾下。二釋經文
二。一釋法經云身心無明者論云以依不覺故心動
動則有苦苦是生死之身果苦也不離因無明又都結三細六麤
云一切染法皆是不覺相故疏由愛下。二釋喻三
隨相說不斷如人萬萬資財一一慳惜若遇喪命因
緣情願總棄以求活命疏又有下二稱性說親斷由
前但云不能自斷仍有可斷之我故云隨相今明執
時尚不覺有所執之我是其過患憑何說斷縱欲斷
之亦是妄想想盡之時但是真我真我無患憑何欲
斷今但以覺無明斷故云親斷也疏如夢下三轉以

喻釋夢喻二說終不肯斷已上喻隨相必須已下喻稱性覺來者覺字去聲呼之經結成中疏種子現行者義如前說引寶積者舉愛例憎墮惡趣者非唯不成佛果仍更墮於惡趣此有二意一如第三生之說二既是存愛迷心愛爲六道之本善惡反覆苦樂循環盡於未來卒未脫免三塗等苦如云忍不落惡趣亦由忍可無我之理及愛爲苦本之義隨順修之故必不落經別釋四相疏二一二別下敘意科分殊常者如前說迷識境之四相也初果除者小乘見道位證我空真如也羅漢未曉者此四相障於圓覺羅漢

若曉卽應悟淨圓覺。故天台說三界之外有塵沙無明此執卽是其疏也。合云阿羅漢今文中且貪字數相對簡略而言矣。約事驗我者事卽我所我所者我所有一切事境通於有情事皆可見可知我則不能反見故約事境反驗於我乃覺他皆非我便知我非他也。二隨釋經約事驗我疏二初謂下敘科意二正釋經徵起中疏覺有心者知一切事境非我也卽此名我經喻釋中疏燕居者燕字音宴依論語中燕居之字經結指中疏覺體者空寂是體是涅槃知是用是覺卽體之用涅槃卽覺卽用之體覺卽涅槃旣體

用相卽故非別有可證之體也。卽當前五門證道中
第三能所俱泯矣。卽是我相者。卽妄見有涅槃所證
所證者。卽我也。我是自體義故。且實證真體旣是法
身真我。今謬證妄體。卽是無明妄我也。類例甚明。經
悟我成人疏二一二悟下敘科意二正釋經巖相中
疏者字正名人者諸家疏論每出人字之體。或能證
人。或能執人。乃至說人聽人。若真若妄。皆云者也。如
梵語佛陀此云覺者。卽指於人。若言菩提。此但言覺
卽指於法類。例如此博學者自當知矣。經細相中疏
無非不盡者。無有過非。而泯之不盡。謂一切過非。皆

已盡也。經了跡跡生疏二三了下敘科意了跡跡
生者既展轉相生。跡跡不盡。卽是眾多生起不斷絕。
義亦是眾生義也。緣次下疏文自釋云。眾生者不定。
執一之謂也。故此云文亦等也。二正釋經徵起中疏。
展轉無窮皆成能所者問。前人相中已云不取能所。
如何至此。却云展轉皆成能所耶。荅皆成能所者。是
此人所了之過非。非此人認之爲是。前人相中覺我
相是能所之過者。但覺一重能所。不知此智又復名
能。今此轉深。故覺展轉無窮。皆是能所。豈不甚超於
前。故經云。悟所不及及卽成所故。科云。了跡跡生釋云了

此無定故離前非又云不定執一皆是明矣經舉喻中疏於自於彼等者結成所釋經中標云非我非彼之句謂俱非此二也緣此中經文稍隱亦須在意分析經潛續如命疏一二四潛下敍科意二正釋經徵起中疏卽心之照者心是自己本心前三門中由別有能證能悟能了等相故不言心今諸跡已盡故言心也如論中異相住相之文但云覺於念異念無異相覺於念住念無住相至最初生相已盡細念亦無直言覺心初起心無初相意全同此此中甚妙宜細審之清淨者亦由離前證悟了等三相直是心自照

故自覺者自心能覺非謂覺自然經云照今乃云覺者。且順常塗疏論多云自覺覺他也。疏證悟等者等於了字謂我相名證人相名悟眾生云了此中總盡故徹真源更無別能證等也。疏擬將此智者此照智也。又業是業用一切作用之智名爲業智但覺潛續之心同於幻化一念不生卽是論中世間自然業智及不思議相等疏雖能除妄者前三也不自除者以此爲是故成潛認而不斷絕如命根矣。此一門除久修觀行用心細者方知雖此再三顯示亦無由了之經正釋中疏前三相者覺是心心所之總名若別說

三名卽一證二悟三了若統言之。卽但云覺也疏心未忘故者。正釋心照名塵垢之義。卽知若心忘此彼此照卽心照便是自然業智。經喻返釋中疏我智俱盡者。我等四相及智慧俱盡也。我智者是我及智非謂是我之智。照體獨立者是生公語清涼大師心要亦云一念不生前後際斷。照體獨立物我皆如。將此四句對詳前文始終相當。故略取一句。若據文字初後敵對卽合云水凍成冰。冰銷水在。心迷成我。我盡心存。今緣心水二字皆是通名。濕況照體獨立也。問彼云照體是離念無相之妙慧。經云心照是壽命相。

之細病。如何用彼以當此耶。答。但動於濕。卽名波浪。
波浪盡而濕性元真。但起於照。卽名壽者。壽者盡而
照體本妙。起於照者見一切覺也。況所引之文。但證
本末法喻。非直以之釋經。經中本無水濕之言。亦無
真心之語。喻中但云冰湯。法中但云一切覺。冰湯必
依水。水之濕性必無變滅。卽知照覺必依真心。心之
照體亦無變滅。經總標中疏多劫六度者。懸談具引。
可檢示之。經展轉廣釋疏二。一後展下。總別科分二。
隨釋經喻中疏。知賊者涅槃云。如人覺知是賊。賊無
能爲藏識者。含藏一切染淨種子。卽阿賴耶識也。自

體卽如來藏。如來藏則唯含無量無邊恆河沙勝妙功德。皆如前辨。然此二名義別者。權實之教不同。故密嚴經云。如來清淨藏。世間阿賴耶。如金與指環。展轉無差別。又說惡慧不能知。藏卽賴耶識。貧窮等者法華云。貧窮無福慧。入生死險道。今取意勢用之。經妨道徵中疏。縱使認我者。意云涅槃是萬行之真性。卽我體性亦是涅槃。縱認我證。亦何所乖。亦何妨道。經非脫釋中疏。還是本愛者所愛之境。卽別五欲及涅槃能愛之心不異。謂卽昔時愛五欲之心。如今復將愛涅槃故。憎亦例知。本習者無始劫來熏習成熟。

故疏愛是生死根者彌勒章已說。苗者造業受報也。經非脫徵云。法不解脫者由前微釋我不解脫云。由謬證涅槃故。故今又徵云。何知所證涅槃之法是謬。是愛。是生死根。而云不解脫耶。經驗我釋疏二。一六讚下敘意。謂實證者疏中順明也。今則逆推以明非實。謂旣驗出瞋喜。卽知有我。有我卽知未證。未證言證。卽知非實。驗處在文。二正釋。經驗知中。疏我執猶堅者。唯識說此第八識云。執受根身爲自內我微細。不可知。外執器界亦不可知。潛藏者與雜染法互爲能所藏也。相續者標釋。經中曾不斷也。慧軍數舉者。

止觀爲將助道萬行爲兵卽前曾聞普眼及三觀利根者已入鈍根者亦有聞思二慧。被四相障之修慧未發故此段經上文云雖經多劫勤苦修道等魔眾頻摧者伏得麤淺惑止得諸惡業故有聞思之慧阿賴耶者此云執藏皆已如前本章中釋訖城者根身種子器界爲境也卽是相分主宰者我相也卽是見分難攻者行相微細不可知故三乘聖者至無學位斷此識中煩惱麤重究竟盡時不復執藏賴耶爲我方能永失阿賴耶名非捨識體如國強臣不賓皇化卽呼爲賊後天兵頻討多時方降皇帝許雪存其性

命還委州郡之權。卽呼爲卿爲臣。圓覺帝主亦復如是。配合可知。此上皆是釋文中堅固執持潛伏藏識。

末那常侍者亦可

云內侍一向內緣。恆執第八見分爲我。依彼生起。常緣於彼。故言常侍。常具我癡愛見慢等四種功用。故云防護防護我也。牢强者滅盡定。有學位中亦得及出世道果。初雖暫伏滅而未永斷。直至三乘無學果位方永斷滅故。故成唯識說。此染汙意相應煩惱是俱生故。非見所斷意識者第六也能執一切法能造三界業。故云謀臣。徧緣內外及三世三性。五十一心所。故云經營。又徧五識之中。五識率爾纔起。此意卽同緣故。云

傍監五將兼於自位故云六門賊主者六賊之主也
我是主故由有六根門戶故能通而遊戲也

此釋遊戲諸根

偷號者卽次前但言爲法瞋彼度此不知此心元是我相卽知被他偷於爲法之號如貪號慈悲瞋號降魔謂貪愛城郭統眾王_{去聲}化貴賤道俗歸臻恭敬供養自謂爲慈悲愍念眾生說法度脫不知都是貪愛潛流改變名號相貌或內心瞋彼因以凶惡之言種種訶叱或打棒或驅出自謂爲法降魔懲惡勸善不知又是瞋恚嫉恨憎嫌等念潛改首換面也故志公云二頭不相辯混雜國王城如此種種變號故令我

說法化主。不覺是賊認爲功能。渾未解脫。越於苦海。而乃安然不驚不懼。仍以自縛。欲解他縛。故云惑我法王也。侵疆者。若論法身。疆界徧法界。盡十方。乃至情界器界。皆同真淨之境。盡是無漏之界。染淨元無二體。今但以迷色等六境爲心外。定有六塵。卽無明我主之界。悟六塵等色。卽是空色。不異空。但自心變起。盡是全空之色。餘聲香等。亦復如是。便是色等三昧。名六妙境。卽般若法身之界。今我已悟此境。屬我不覺妄起。潛執爲有。潛生愛著。還成塵界。故云往往侵也。由此觀之。難明住之難定。故云擾我觀境也。觀

卽觀智解也。觀行行也。

慧定也。

境卽不出六境及真如境隨

所觀時。卽爲其境外怯者以有悟心常欲覺察故妄念似劣不敢故意生情貪瞋造業專伺候觀照明顯如晝日時。卽潛伏故令推察身心道理者但見自己是悟解分明人。不愛名利人爲法爲師人都無過失人。故云晝伏。及乎親對違順之境乖於情念極不稱意之時迷習覆翳對面不覺之時惛黑如暗夜恣行計校種種生情或擬退屈或擬違背人法或擬別爲調致或思量道理擬雪身歸過於前人種種生起不可覺非故云夜行而內挾者挾字之意如史記中說。

曹操未登九五時。號曹公。挾天子以令諸侯。今借此一字爲語勢。無明等者。謂六識之境。如上或覺或妄。或伏或行。若藏識中三細。及五末那。俱生我相等種。卽與無始住地根本。常不捨離。縱使行人覺察觀照。之時。此亦潛續。故云晝夜不斷。此正釋經曾不間斷之句也。故唯識云。此識無始時來。一類相續。常無間斷。是界趣生施設本故。性堅執持。令不失故。乃至與內習氣外觸等法。恆相隨轉。然此中所用。具足八識之義。具如本章。故此不釋。經覆推疏二。一一覆下。敘意疏恐聞下。二釋經。故推徵云者。然經文於毀者反。

明於說者順明。若疏則皆反順具明。若經文亦各反順具明者。應云。若知我空。無毀我者。有毀我者。我未空故。若知我空。無我說法。有我說法。我未斷故。餘文可解。經決斷中。疏各唯增益者。水土資於甘草。甘味增益。資於黃蘖。苦味增長。故知由種不由水土。以喻萬行。資於我相。卽是魔業。資於覺智。卽是佛因。故知由心不由萬行。此意極要可明示之。經抑聖中疏了義等者。次自釋云。心境本空等。卽釋題中廣引經文配了義之句。全同此意。言心境空者。如心經云。無色無受想行識。無眼界。乃至無意識界。或云。能見及所

見見者悉除遣。或云心滅則種種法滅等惑業者惑卽煩惱。謂貪瞋癡等業卽善惡不動等本淨者皆空之義。凡聖不異者。凡夫彌勒皆同一如。諸佛眾生同一法界。故不異也。因果皆圓者。因該果海。果徹因源。故皆圓也。就佛見之者。上皆釋經中如來解也。且眾生迷倒下。正顯行人以如來解及所行處爲自修行之意。種習者。種子習氣也。根深者。明此倒情種子。眠伏藏識之中。雖復覺悟亦難了知。故云深也。縱解法門。現用隨念者。明行與解違不稱所悟之處。無礙言教者。雖說無作無受。而且善惡因果不忘。或說無證。

無修不礙斷惑求證。或說因該果海。不妨歷位而修。
或說佛不度生。而又應機說法。如此之意。徧諸大乘。
故言無礙也。亦只如然者。將佛所證。同自心量也。不
覺念者。如眼不自見。指不自觸也。不知冥通等者。揀
於真證。不同未證之心。隨相信者。未能稱實信故。大
品云。不信一切法。是信般若等平等之談者。卽前心
境本空等意。不能斷惑等者。由迷此平等之談。便不
伏進求。今時參學之流。多迷此意。如聞說眾生本來
涅槃。無漏智性。本自具足。不得此意。便云性本具足。
無可添補。煩惱本空。無可除斷。由作此見。便信任身。

心不覺施爲。元是隨情逐念。兼云。稱性脫體全真。認妄爲眞。惑之甚矣。此義廣如懸談。初教起因緣。決擇悟理。應修門中。已具分析。數他寶者。具云。如貪數他寶。自無半錢分。於法不修行。多聞亦如是。經騁已齊聖疏二。一二騁下。顯科意。抑高者。謂言佛解處行處。只似依心行境界。故云就下。騁已者。馳騁自己。謂言已證菩提。已得涅槃成佛。已訖。二正釋。經認聖智中。疏理者。涅槃也。智者。證也。證理。故直云智身。身者。體也。卽智自體。使名爲證。如諸識中。自證分也。根本戒者。比丘四重。尼有八重。大妄語者。僧尼皆同。謂自言。

我得過人法。乃至而言。我知我見。虛誑妄語。除增上慢。此是彼之所除。故云非此文意。彼犯重。此無犯。此累悟解。彼無所累。經驗凡情中疏。或卽證悟者。縱得他已無二。隨喜他勝。他善尙自不定。或是證悟之力。或亦不關證悟。如北鬱單越心行無我。豈是證耶。上界豈有現行嫉妒等耶。故知自驗心迹順於道行。仍未的定。若驗心迹。有嫉妒瞋恨等事。卽定知非道。除大菩薩逆行之迹。然約心之本迹。以對順道乖道。有四句。一唯順菩薩隨喜他善。及行施等。二唯乖凡愚嫉妒。及行殺等。三亦順亦乖。菩薩殺等心順迹乖。凡

愚施等心乖。迹順。四不乖不順。謂佛。

染淨無礙。

都無心故。及羅

漢。

闕大悲智願故不順。

惑業苦盡故不乖也。若但約心順爲定不定四句

者一定順道。二定乖道。如前中初二句。三乖順俱定

謂菩薩自知四乖順俱不定。謂初心行施等。自不能

辯及觀他施等亦然。經結成障覺云。是故不能入清

淨覺者。從前數節。一一結云。不入覺者。大而言之。皆

爲我愛。斯爲根本。然若具明入覺須得其門。華嚴玄

義章十五門。

亦藏和尙所述

第十明入道方便門。有三。一揀

心。二揀境。三造修勝行。別卷具引經趣果中疏。唯宗

名數者。且據法相宗中人也。以經云。唯益多聞意順

此故若破相宗中之人。卽唯宗道理。雖亦不尙名數。皆不務自照己心。此類之人。名爲慧學。非多聞之相。故略不言之解義。我見唯長者。縱使實得廣解。名數。問卽皆知。或善於立破。破諸言論。亦轉增我相。欺慢餘人。故有云。經論眾生出世。因解來翻。更長貪瞋。若約任運。我慢貢高。卽破相法。相兩宗人同。若據分別心中。定認凡夫。未除我執者。卽偏是法相宗人。我見
增長。

破相宗人無故
意定斷以不立。法故。問。解法輕人。許云。我相增長。其所執之見已定。何言增長。答。亦有增義。謂不習教人。但任運執。若聞解者。言有言無。或言同佛異佛。皆不

定信不信。若習法相之人。定不信。凡夫無我。故知執見轉堅。故云增也。不能了自心者。次云。云何知正道。彼由顛倒慧。增長一切惡。一切惡者。我見亦在其中。既增惡由不了心。卽正同增我。由不求悟。卽知求悟是令了心。故引爲證。又旣由不了心成顛倒。卽知定須先了心也。據此所證文義四句。總要緣前已頻引聞者必熟。故標初後二句。等取中間兩句也。又智論者。彼有三偈。故此云等。餘者。今取意說。謂有慧無聞。如闇中有目。亦不知實相。此如南宗禪學。實了心者。未達諸法性相。又不學之。無聞無慧。如人中牛。灼然不知。唯去二種方知實相。

卽前悟淨圓覺以淨覺等也。經科斷惑且當成因說

下

佛說

下者由前數段經文說修行中有多過患皆結云不

入淨覺故此勸誠令離過用心方成正因也。經順釋

中疏根本等者百法標云根本唯識頌但云煩惱總

說六種頌曰煩惱謂貪瞋癡慢疑惡見長行釋云性

是根本煩惱攝故得煩惱名謂貪等六事是隨煩惱

之根本故今經云貪瞋愛慢者彼論愛非其數以無

別性貪所攝故此唯三法是彼論也貪者於有有具

染者爲性能障無貪生苦爲業謂由愛力取蘊生故

瞋者於苦苦具憎恚爲性能障無瞋不安惡行所依

爲業。謂瞋必令身心熱惱。起諸惡業。不善性故。慢者恃已於他。高舉爲性。能障不慢。生苦爲業。謂若有慢於勝德法。及有德者心不謙下。由此生死輪轉無窮受諸苦故。此慢差別有七九種。廣如大疏。疏小隨者。隨煩惱二十中。有三類。初十小隨。次二中隨。後八大隨。真如大疏。八識章中釋也。今詔曲等名小隨者。各別起故。名小。但是貪等分位差別。等流性故。名隨詔者。爲罔冒他故。矯設異儀。險曲爲性。能障不詔。教誨爲業。貪癡一分爲體。嫉者。徇自名利。不耐他榮。妬忌爲性能障。不嫉憂惑爲業。瞋一分爲體。然根本六中。

今闕癡疑及惡見者癡在偈故三番徵釋已決疑故偈云我身卽是身見身見斷則餘見自除故餘謂邊此等皆依身見起故疏重舉等者意云謂上已明貪瞋愛慢今

又重言恩愛故次釋云生死根等其斷惑行相真如大疏所明餘文可見經偈諷中如次前便用長行四門大科以科之經云悟刹者正顯刹無體約迷悟以分疆也

前云分疆用此意矣如入唐下喻明故知下法合乃至釋法愛及我身文皆顯著經依師離病疏二一自下下明科意二釋經文經長行中疏二一正說下開章敘意有少相濫者待至本文疏自標指若便懸說

初學難領。二別釋經文。經令識中疏三。一簡餘下。釋
標指最初因緣者。其次文云。是故於此勿生疲厭。善
財白言云。何學菩薩行等。乃至善哉。汝已發阿耨菩
提心。復能求菩薩行。善男子。若有眾生能發阿耨菩
提心者。是事爲難。能發心已。求菩薩行。倍更爲難。善
男子。若欲成就一切智。智應決定。求真善知識。勿生
疲懈。見善知識。勿生厭足。所有教誨。皆應隨順。於善
知識。善巧方便。勿見過失。亦同此
中意也疏法句經者。文具
云。爾時寶明菩薩白佛言。世尊。云何是善知識。佛言。
善知識者。便是疏中所引。直至住於實際。皆真如不

變義也。同此不住相。從畢竟空中下。卽真如隨緣意
也。同此現塵勞讚梵行華手經者。彼云云何名爲真
善知識。彼云若有具足四種法者。名善知識。云何爲
四。一者善知教化之法。二者善知修道之人。三善知
教化之過。四善知修道之過。是名四法也。疏離凡下
二釋示相。經中有順行逆行。疏自指配。經云不住者。
若有少法當情。皆名住相。乃至菩提涅槃。尚不取著。
何況世間夢幻境界。疏不應住色等者。此密用金剛
經經次文云。不應住聲香味觸法。生心應無所住而
生其心得無住心卽契圓覺。經云塵勞者。塵是六塵。

勞謂勞倦。由塵成勞故名塵勞。又染心勤苦亦是塵勞。卽疏中指貪等爲塵勞之意也。疏梵行等者。卽淨名居士現毗耶城俗姓雷氏。於提婆城取妻曰金姬。男名善思。女名月上。示跡同凡化在家眾故名梵行。疏同事攝者。四攝之一也。已如彌勒章說。心旣相親者。如法華中長者後園種種方便慰喻窮子。亦如杜順和尙初食肉復食臭屍。又如志公食魚鱠訖吐之。水盆魚皆跳踴示欲之過等者。經云。示有妻子常修梵行。現有眷屬常樂遠離。乃至入諸淫舍示欲之過。入諸酒肆能立其志等。亦同華嚴者。卽善財所遇婆。

須密女示行貪行善財遇已得菩薩離欲際解脫門住第五無盡功德藏迴向等無厭足王示行瞋行得如幻解脫門勝熟婆羅門示行癡行得般若波羅蜜解脫門也疏說非梵行者今時此事甚眾宜審詳之壞見等者忘却此論題目待檢之疏結成下三釋結益經正舉中疏如雪山捨身者卽涅槃經第十一彼云我於過去身爲童子於雪山修行求道時聞羅刹於大林中宣說半偈我當詣彼作如是言善哉聖者何處得此半如意珠乃至爲我宣說四句云諸行無常是生滅法生滅滅已寂滅爲樂我以身施羅刹如

故現帝釋形等。香城敲骨者卽大品般若經。彼云時法勇菩薩於尋香城宣說般若波羅蜜多經。有無量百千億人天大眾所共圍繞。爾時常啼菩薩求聞是經等。云儒典尙令等者。論語云。事父母能竭其力。事君能致其身。慤疏云。然因法出塵法爲舟筏。由師遇法師是船師。無師船且不行。無船渡無憑託。船依師運。敬法須以敬師。故觀音慶已超聞。勸凡同仰。是以全身報法。賣髓酬恩。割肉聞經。焚身謝德。嗚呼。未學盜法。非師情希。鳳鶴之姿。豈覺鏡梟之醜。此乃將興益滅。求悟翻迷。破法傷師。報如形影。經遮疑中疏二。

一指前下正釋。在文易見。但要善巧顯示學人。疏然爲下。二別議師資。然準此盡心事師。實亦難得。如此弟子及如此求道之人。復不易得。如此眞正師友。以當事之故。中論偈云。真法所傳。及說者。眞善聽者。弟及諸志。難得故。通指上三種也。是故說生死。非有邊。以難得求。追人難得。故_{三種}生死非有邊。非無邊也。非字通二處讀之。謂所言邊畔盡持無邊。難得。非的定永不得。得卽生死必盡。然非長無邊際。故云非無邊。此偈因長行有問。此生死法爲有邊。故云非無邊。此偈因長行有問。此生死法爲有邊。國際爲無邊際。故偈答之云爾。然此爲徒等言。借論語文勢。彼云如知爲君之難。爲臣不易。故云爾。勿因此誠者先勸弟子也。世有非法之人。假爲菩薩之行。誑

惑愚夫。還說空無相之言。不拘齋戒。以麤行爲大乘。
以真修爲小教。愚人不曉此意。却敬彼人。不知弟子
有擇師之分。故今勸示。且須聽受他說法。自覺心中
的有覺悟。仍須勘以聖教合與所稟宗中相應經教。
相合佛言相契。若與合者。名爲正觀。若不合者。名爲
邪觀。又須與師同處日久。諮參徧問。眞俗知他心在
佛道。大悲利生。旣識得此師心源。卽須忘情絕慮。沒
命歸依。縱見他接物化源種種方便。如前所說。不得
生疑。又此藥下勸師也。佛語種種。各有對治。如誠俗
徒云剃頭著袈裟持戒。及毀戒天人常供養。當令無

所乏。如是供養彼。名爲供養我。我卽佛自稱也。又云破戒惡行諸比丘。猶勝精進諸外道。及乎誠僧。又云破戒之人。五千大鬼常遮其前。掃其脚迹。破戒人不得於國王地上行。不得飲國王水。又云。竈以鐵槌碎身。如塵熱鐵纏身。種種極苦。不得破戒身口等。受信心檀越衣服飲食臥具。種種物俗人合服。前藥僧卽合服此藥。不宜互錯。必受其殃。今勸爲師之人。必須量心道力。勿等閑認他上人。此藥本治弟子。不爲師主。師主服之。卽重增病苦。以至於死。方藥各有對治。不得錯服。服之增病等者。夫求方藥。不離一藏經律。經律中

言大底有二。一說解則空而無過行則逆順皆通。二說解則因果歷然行則止惡修善服此藥人若遇後教卽云彼誠迷人初心人小乘人我是悟人久學人無我人作此意度則後藥無施也。若遇前教文增惡習縱任情意自陷陷他故言無藥可治也。以縛等者卽淨名云若自有縛能解他縛無有是處若自無縛能解他縛斯有是處又云自疾不能救焉能救諸疾人斯之謂矣。經外意中疏搏食等者謂者朴拙準經意的說財食也。食有四種此當段食食總段別以段揀餘古譯經論訛云搏食今此三藏承古訛音遂作

搏字又不分總別謂搏卽食仍略食字故云搏財也。經顯益中疏嬌慢若起等者夫人心若愛敬於他所作皆是若輕慢於彼則見彼所作皆非世俗傳云憎人嫌醜待人嫌久又云愛忘其惡等也。又史書中有寵臣獻奇果於君初功後過之義也。然慢念惡念亦互通先後或因起惡念卽慢他或因慢他卽惡念起言惡念者非謂擬損害意中以他菩薩慈悲利物之行呼爲求名求利或疑中私染淨不分等便爲惡念也。障覆自心者旣疑他意唯見他懇切勸人謂言他有所求進退皆疑言教何入經分別四病令除疏二

一二分下會通科意。答第二問者。依何等法據此科云。分別四病令除去。卽當答除去何病之問。詳其義意。乃是答第二問。此義如何。疏次自釋云。標以妙法等。釋意甚明。問若爾者。何故文云。應離四病。答疏自釋云。此法離於四病方可依。故疏中二故字皆是釋此段。合當答前依何法問之所以也。除病之問等者。意明其答除去何病之問下。自有文。彼一段文令怨親平等用心以去。無始自他種子。結云。卽除諸病。若將答所依法更不相當。文亦不次。又問曰。若爾如何判決。問答相應之科段。答曰。問雖次第列名。佛答亦通。

亦別此有深意可細詳之文似濫者以此段中分別四病令除似荅除去何病之間不似荅依何法之間故云濫也由此相濫故云舍而科之二正釋經文經別釋行相疏二一二別下示又繩墨者契經有五義此當一也謂楷定正邪意言者意中言也時俗人語因責人非豈不亦云汝意裏道什麼語又云我意直道汝如是如是亦卽意言分別二別釋經生心造作疏二一釋標名辨相二一辨相下正辨行相思惟揣度入聲等者此諸行相是多種人心意不定主一人或如此或如彼不可一一著爾許多或字故但列之由

是行多相反。如宴坐施爲止山遊世等。須善自分析隨執其一者。但說同一類行於一類中。不妨亦有作兩般三般者。如修造供養是一類。或作僧俗講或經咒。或宴坐止山及觀空有等。於諸類中復有別類。亦有一人總修者。或有相違必不俱者。如講者不妨持念。及遊世界勤衣食等。持念者不妨止山。相違者止山遊世也。勤衣食故飢寒也。端坐施爲也。施爲通修造供養講說等。愛身厭身也。疏此病下。二明病起因起行起用者。文云卽起諸幻以除幻者。又云變化世界種種作用。又云照諸幻者。便於是中起菩薩行。又

云復現智力種種變化度諸眾生。又云復起菩薩清淨妙行度諸眾生。又云復起作用變化境界失彼文意者迷彼皆以悟淨覺心於觀行中作如是等行。今乃但見度生等言便悟僧講俗講但聞起行之言便欲修造供養持經咒等。但聞起作之言便欲種種施爲遊世界等。聞照幻之言便欲深山宴坐觀空有等。聞除幻言便欲厭身故受飢寒等也。但憑此行欲契圓覺故云成病疏指體下二釋指體結名積土聚沙者卽法華方便品偈會權歸實萬善悉趣菩提之意也。文云聲聞若菩薩聞我所說法乃至於一偈皆成

佛無疑

云云皆取意引

若以小乘化我卽墮慳貪此事爲不可

我本立誓願欲令一切眾如我等無異化無量眾

生令入於佛道若於曠野中積土成佛廟乃至童子

戲聚沙爲佛塔如是諸人等皆已成佛道或有人禮

拜或復但合掌乃至舉一手或復小低頭乃至供養

像一稱南無佛皆已成佛道歇卽菩提者是佛頂文

具云狂性自歇歇卽菩提勝淨明心不從人得其本

末緣起前已引說經任意浮沉

圓覺經略疏之鈔卷第二十二